

SURANA PAUL TO TITUS

POGAU BHAA-BHAANA

Titus sii o mia inda motolentuna miana Yahudi mopesuana agama Karasiteni kasiimpo amembali sabhangka tee mohambana Paul i nuncana karajaana. Sura incia sii atotujuaka to Titus, tee i wakutuu incia sumai incia dhaangia i Kreta roonamo Paul abholia to a'urusuaka jama'a iwe sumai. Dhaangia talu giu ipakawaakana i nuncana sura inca sii.

Bhaa-bhaana, Paul audhaniaka Titus to manga sifatuna manga mia bhemomembalina kapalana jama'a. Giu incia sii apakawaakea roonamo abhari mpuu o mia momadhakina pewauna i Kreta. Padha incia sumai, Paul audhaniaka Titus mboo opea carana to aadhariaka saasaangu kolompona mia bhemomembalina anggotana jama'a tuaapa fe'elina miana Karasiteni. Tee mofaraluna mpuu siitumo o miana Karasiteni tabeana amalape tee amaasiaka dhadhi mo'amani, bholi abanci mia, bholi apogera-gera atawa aumbaaka potagatagali.

Antona

Porikanaana pogau 1:1-4

Manga kapalana jama'a 1:5-16

Opea iwaajibujukana manga mia modhaangiana i nuncana jama'a 2:1-15

Kaadhari tee kaudhaniaka 3:1-11

Katutubhi 3:12-15

*Salamu**1:1-4*

¹ Minaaka i Paul, bhatuana Aulata'ala tee rasuluna Isa Al Masi, iaku apiliaku tee alambokoaku to kutulungi manga mia ipilina Aulata'ala mamudhaakana amatangka o iimanina. Iaku uka tabeana kuadhariaka kabanara i manga incia, tee kabanarana sumai mobhawana manga incia to adhadhi asaalihi.

² Neatina iimani tee kaadhari incia sii to taharapuaka dhadhi mobakaa. Aulata'ala padhamo ajanjiakea o giu incia sumai minaaka i piamo itu wakutuuna dunia indapo atopadhaangia, tee o Aulata'ala inda bheagau-gau.

³ Janjina sumai padhamo apatokamatea i wakutuu mopadhana itantuakana alaloi Lele Malape iparacaeaakana to iaku apokana tee parintana Aulata'ala Mangapasalaamatina, mamudhaakana kupakawaaka Lele Malape sumai.

⁴ To Titus, ingkoo kuabhikomo mboomo anaku, roonamo ingkita tapokana taparacaea tee Isa Al Masi. Iaku kuharapu maasangia Aulata'ala Ama tee Isa Al Masi Mangapasalaamatina adhawuko rahumati tee umembali udhadhi upomalape tee Aulata'ala.

Tugasina Titus i Pulo Kreta

Pemingkuimo mboo sii Imembaliakana Mia Alaenga Atoangka to Kapalana Jama'a

1:5-16

⁵ Iaku kubholikomo i Pulo Kreta mamudhaakana umembali u'urusu manga giu mofaraluna i'atoro, tee mamudhaakana uangka manga

kapalana jama'a i saasaangu kota mboomo mopadhana isameaakaku to ingkoo.

⁶ Kapalana jama'a tabeana o mia inda mokokasalaha, incia tabeana samiamea o bhawinena tee akeniakea mpuu o janjina tee bhawinena. Manga anana manga incia tabeana ako'iimani tee inda atoraekaka akapatuli atawa adorohaka.

⁷ Kapalana jama'a tabeana o mia inda mokokasalaha roonamo incia mo'atorona tee mojaganina tuaapa o mia molaianina Aulata'ala. Incia bholi akapala bhatu tee amasimba a'amara, mencuana pande sumpu, mencuana pande pobusu, atawa apeelo laba tee cara madhaki.

⁸ Maka incia tabeana sadia amalape atarima tamu i bhanuana, amaasiaka manga giu malape, amembali ataangi karoni minaaka i giu momadhaki, a'adili, asaalihi, amembali akuasai karoni,

⁹ tee akeniaka kasamea molaengana motoparacaea mboomo mopadhana iadhariaka, tee mboo sumai incia amembali anaasehati mia tee giu mobanara, tee amembali asusuaka kasalahana manga mia mobhalia.

¹⁰ Giu incia sumai afaraluu mpuu roonamo abhari o mia modorohaka, mia mopadede tee mopasaladhalana manga mia mosagaanana. Ipatujuakaku siitumo to manga mia moadhariakana ande bhari-bharia umane tabeana atotandaki.

¹¹ Rampaakanamo sumai, ngangana manga incia tabeana atosoncongi, roonamo manga incia apahancuru iimanina saangua antona bhanua

tee aadhariaaka manga kaadhari inda molaenga mamudhaakana apotibhaaka laba tee cara inda momalape.

¹² Dhaangia o nabii iosena manga incia mominaakana i Pulo Kreta uka apogau, "Manga miana Pulo Kreta sumai o pande gau-gau, manga incia mboomo binata masega, mia momaso'o tee mia momangare."

¹³ Kasakusiina nabiina sumai atotuu, rampaakanamo sumai manga incia tabeana umpuumpuu usasia, mamudhaakana manga incia akeniaka kaadhari mobanara pokaiana tee iimanita,

¹⁴ tee mamudhaakana manga incia inda aperangoi manga tulatula momangenge inda motomatauna asalana minaaka i miana Yahudi tee inda aose parintana manga mia inda moosena kabanara.

¹⁵ I ngangarandana mia mangkilo, bhari-bharia giu amangkilo uka, maka to manga mia mopadhana motopanaajisi tee mia inda mopara-caeana tee Al Masi, inda dhaangia saangu giu uka momangkilona to manga incia, roonamo fikiri tee antona ngangarandana manga incia atokamo amarombu.

¹⁶ Manga incia apogau ande apomatau tee Aulata'ala, garaaka o pewauna manga incia apesapuaka Aulata'ala. Manga incia amasega, adoro-haka, tee inda saangu giu malape uka momembalina ipewauna.

2

Kaadhari Mowaajibu to Mancuana, to Dhadhi

*Mangura, tee Bhatua**2:1-10*

¹ Maka ingkoo, uwaajibu upakoleleaka manga giu mopokanana tee kaadhari mobanara to iimanita.

² Adharia manga umane moko'umuru mamudhaakana a'aarifu, alaenga atohoromati, amembali ataangi karoni minaaka i giu momadhaki, tee ako'iimani. Manga incia uka tabeana amatangka i nuncana iimanina tee Isa, ampuumpuu amaasiaka mia mosagaanana, tee asadhaadhaa asabara.

³ Tee manga bhawine moko'umuru uadhariakea uka to adhadhi amaeka i Aulata'ala, inda afitanaa mia, tee inda akatagiaaka asumpu angguru, maka tabeana aadhariaaka manga giu momalape.

⁴ Ande manga bhawine apewau mboo sumai, manga incia amembali aadhariaaka manga bhawine mangura mamudhaakana amaasiaka umanena tee anana,

⁵ ataangi karoni minaaka i giu madhaki, adhadhi amangkilo, amakidha a'atoro bhanuana, amalape incana, tee ata'ati i umanena mamudhaakana inda samia uka o mia bhemo-eleena firimanina Aulata'ala.

⁶ Manga umane mangura tabeana unaasehatia mamudhaakana amembali ataangi karoni minaaka i giu madhaki.

⁷ I nuncana bhari-bharia i karajaamu, tabeana umembali sandarana karo malape. Manga incia uadharia tee karelana totona incamu tee uko'adati,

⁸ tee bhoasakamu tabeana abanara mamudhaakana manga bhalimu amaea roonamo inda dhaangia saangu giu madhaki uka momembalina ipogauakana to ingkita.

⁹ Udhaniakea manga bhatua mamudhaakana ata'ati tee apasanaa opuna i nuncana sagala urusa, tee bholi atagali pogauna,

¹⁰ bholi amanako, maka asusuakea ande manga incia amembali atoparacaea mpuu, mamudhaakana tee apewau mboo sumai manga incia bheapekakesa kaadharina Aulata'ala Mangapasalaamatina.

Rahumatina Aulata'ala Apasalaamati Bhari-bharia Maanusia
2:11-15

¹¹ Roonamo Aulata'ala padhamo asusuaka rahumatina to apasalaamatiaka bhari-bharia maanusia.

¹² Rahumatina Aulata'ala sumai mangaadhariaka mamudhaakana inda tamendeu manga giu inda mosaalihi tee tamendeu nawusuuna dunia, tee mangaadhariaka mamudhaakana tamembali tataangi karota minaaka i giu momadhaki, tadhadhi tabanara tee tata'ati i Aulata'ala.

¹³ Sii-sii ingkita tangasaana taantagi eo masanaa iharapuakata sumai, i eo incia sumai o dunia bheakamata kamuliangina Aulata'ala Momaoge tee Isa Al Masi Mangapasalaamatina.

¹⁴ Isa Al Masi padhamo apasarakaaka karon roonamo ingkita to mangapabebasiaka minaaka

i bhari-bharia giu momadhaki, tee mangapamembali uumati molapana minaaka i bhari-bharia hali modorohaka tee mangapamembali uumatina morajina mopewauna kalape.

¹⁵ Adhariakamea bhari-bharia giu incia sumai, unaasehatakamea tee usasimea manga mia tee kuasa modhaangiana i karomu. Bholi dhaangia o mia mopanda'enteko.

3

Kasamea Kapadhaa

3:1-14

¹ Udhaniakea o jama'amu mamudhaakana atungku i manga kapala tee manga mia mokokuasa, tee sadia asiapu apewau manga giu malape.

² Paumbaia manga incia mamudhaakana bholi afitanaa mia atawa apogera tee incemapo uka, maka tabeana amaruna incana tee amalulu o bhoasakana pogauna tee bhari-bharia mia.

³ Roonamo i piamo itu ingkita uka takabhongobhongo, inda tata'ati tee tasaladhala. Ingkita mangapabhatua nawusuuta tee kapeeluata karota. Ingkita tadhadi i nuncana neati madhaki tee tagigibulu tee tapobanci-banci.

⁴ Maka wakutuuna Aulata'ala Mangapasalaamatina asusuaka kaasina tee kalapena incana to ingkita,

⁵ ingkita tatopasalaamati mencuana rampaakanamo padhamo tapewau giu malape, maka roonamo kaasina. Incia mangapasalaamatiaka tee Rohina Aulata'ala Momangkilo to mangapekangkiloni minaaka i

dosata, sabutuna ingkita tatopalaahiri pendua tee takodhadhiaka dhadhi mobhaau.

⁶ Aulata'ala mangalaliaka mpuu-mpuu tee Rohina Momangkilo i bhawota alaloi Isa Al Masi Mangapasalaamatina,

⁷ mamudhaakana tee rahumatina Isa, ingkita tamembali tapomalape pendua tee Aulata'ala tee mangapamembali motarimana tinauraka mopokanana tee kaharaputa, siitumo tapotibhaaka dhadhi mobakaa.

⁸ Opea ipogauakaku sii atotuu-totuu abanara, tee iaku gauku upakawaakea manga giu incia sii tee mpuu-mpuuna incamu mamudhaakana manga mia moparacaeana tee Aulata'ala sadia a'usaha to apewau giu momalape. Giumo mboo sumai momalapena tee mokofa'edana to maanusia.

⁹ Pekaridhoa o karomu minaaka i potagalia inda mokoguna, tulatulana kamiaana mia, pogera-gera tee potagatagaliana so'alina hukumuna agama, siitumo hukumu modhaangiana i nuncana Kitabi Taurati, roonamo bhari-bharia sumai asia-sia tee inda akofa'eda.

¹⁰ Ande dhaangia o mia moumbaakana pogera-gera i tanga-tangana jama'a, tabeana usasia podho sampearo atawa rua mpearo, sapadhana sumai bholimo uposabhangka tee mia incia sumai.

¹¹ Roonamo umataua o mia mboo sumai atotuu-totuu asaladhala tee akodosa, siitumo incia aumbaaka kahukumu to karona.

¹² Iaku bhekulamboko Artemas atawa o

Tikhikus to aumba aleongiko. Sapadhana sumai, uumbamo pekadhei to ukawaaku i Nikopolis roonamo kuhaejati kumboore iwe sumai kangengena bulaana kagari.

¹³ Usahamo totuu-totuu to uhamba Zenas ahali-ina hukumu sumai tee Apolos, mamudhaakana manga incia inda tee kakurangana i nuncana lingkaana.

¹⁴ Manga miata moparacaeana tee Isa tabeana apengkaadhari to apewau manga giu malape mamudhaakana amembali atulungi manga mia mokakuranga tee manga giu ifaraluuna mpuu-mpuu, ancotala o dhadhina manga incia inda akoguna.

Salamu *3:15*

¹⁵ Bhari-bharia witinai mopoosena tee iaku alamboko salamuna to ingkomiu. Pakawaakea uka o salamumami to manga sabhangkata mosa'agama. Maasangia o Kawasana Opu arahumati bhari-bharikomiu!

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3